



Rabu, 31 Mei 2023

Ogen: 1 Korinti 3:16-17



Jagai Kulandu



Peringeten 'hari tanpa tembakau' tahun 2023 enda si teptep tahun iperingeti tanggal 31 Mei alu tema: kita butuh makanan bukan tembakau. Menarik kal tema enda, nuduhkanca kai si jadi prioritas i bas kegeluhen. Man kalak si enggo candu nandangi mbakau enda, megati pangen ia la man gelah banci 'ngkonsumsisa' subuk alu ngisap ntah pe man belo. Adi siperdiateken masyarakatta khususna kalak Karo mbelin kal nggunakan mbakau enda, kuga buena kalak si ngisap ras si man belo. Teptep kalak lit pilihenna kerna kegeluhenna. Tapi secara internasional lit peringeten kerna sada wari bebas mbakau.

Renungenta wari enda ngajuk kita njagai kulanta gelah sehat. Erbage si banci mpengaruhi kesehatenna, la saja gaya hidup subuk pertunduh, perpan, tapi pe cara rukurta. Lit si ngatakanca adi ngisap ntah pe nontil e ngkurangi latih rukur. Tentuna peringeten wari tanpa tembakau enda mbelin mpersingeti kita gelah menaken geluh sehat. Tentu carana alu njagai kula gelah tetap sehat.

Paulus mpersingeti perpulungen Korinti kerna Rumah Pertoton. Rumah Pertoton e badia, perpulungen me Rumah Pertoton e, janah Kesah Dibata ringan i je. Alu bage ipersingeti maka rumah pertoton e arus ijaga, ipekena ula sempat ceda. Sabap Dibata la meriah ukurna adi icedai Rumah Pertoton e. Ikatakenna, ise singkernepken Rumah Pertoton e, ikernepken Dibata me ia. Amin kita empuna geluhta, gelarta daging kula ta e tapi e Rumah Pertoton Kesah, arus si jaga, si pekena-kena isilahken i bas erbage si erbahanca la sehat. Salah sadana mbersihkenca arah erbage si banci ncedai kula termasuk penggunaan tembakau. Mari si jaga kebadian Rumah Pertoton Kesah e me dirinta, ras geluhta.